

赫陽班氏遺書

卷三曹大家集

班氏遺書曹大家集序

漢世家學相尚女學傳授與男並重伏勝之女口傳尚書
伯喈之學嗣於蔡琰他如緹縈上書代父贖罪馬芝仲精
思親作賦皆其著也班氏女學前有況女爲成帝婕妤至
班彪女昭才兼文史奉詔續兄固漢書爲八表一志大儒
馬融伏閣受讀身沒之後深宮舉哀使者護喪號稱大家
備極哀榮古今名媛邈焉寡儔今漢書侯王八表天文一
志無大家名晉書天文志謂後書志爲馬續所撰疑固所
撰表志大體已成大家或略事潤色歟大家又注幽通賦

文選李善注間采其說又注列女傳十五卷今存數條其
他撰文凡十六篇子婦丁氏都爲一集專集見於東漢者
實始於此隋經籍有班婕妤賦二篇今併詩一首附大家
集以見一家才女之盛焉壬戌六月張鵬一

後漢書本傳

扶風曹世叔妻者同郡班彪之女也名昭字惠班一名姬
博學高才世叔早卒有節行法度兄固著漢書其八表及
天文志未及竟而卒和帝詔昭就東觀藏書閣踵而成之
帝數召入宮令皇后諸貴人師事焉號曰大家每有貢獻
異物輒詔大家作賦頌及鄧太后臨朝與聞政事以出入
之勤特封子成關內侯官至齊相時漢書始出多未能通
者同郡馬融伏於閣下從昭受讀又詔融兄續繼昭成之
永初中太后兄大將軍鄧騭以母憂上書乞身太后不欲

許以問昭昭因上疏

下文見

太后從而許之於是隲等各還

里第焉作女誡七篇有助內訓

下文見

馬融善之令妻女習

焉昭女妹曹豐生亦有才惠爲書以難之辭有可觀年七十餘卒皇太后素服舉哀使者監護喪事所著賦頌銘誄問注哀辭書論上疏遺令凡十六篇子婦丁氏爲撰集之又作大家讚焉

扶風班氏遺書曹大家集目

關隴叢書

敘

本傳

賦四

東征賦

鍼線賦

蟬賦

大雀賦

有序

頌一

欽器頌

缺

疏二

上鄧太后疏

請召兄超生還疏

雜文一

難問神缺

注二

幽通賦注

列女傳注

女誡七篇

附班婕妤傳

自悼賦

擣素賦

怨歌行

扶風班氏遺書卷三曹大家集

關隴叢書

後漢扶風曹大家班昭撰

富平張鵬一輯

賦

東征賦

文選注引大家集曰子殺爲陳
留長大家隨至昌作東征賦

惟永初之有七兮余隨子乎東征時孟春之吉日兮撰良
辰而將行乃舉趾而升輿兮夕予宿乎偃師遂去故而就
新兮志愴悵而懷悲明發曙而不寐兮心遲遲而有違酌
樽酒以弛念兮喟抑情而自非諒不登櫟而極蠡兮得不
陳力而相迫且從衆而就列兮聽天命之所歸遵通衢之

大道兮求捷徑欲從誰乃遂往而徂逝兮聊游目而遨魂
歷七邑而觀覽兮遭鞏縣之多艱望河洛之交流兮看成
臯之旋門既免脫於峻嶮兮歷滎陽而過卷食原武之息
足宿陽武之桑間涉封丘而踐路兮慕京師而竊歎小人
性之懷土兮自書傳而有焉遂進道而少前兮得平丘之
北邊入匡郭而追遠兮念夫子之厄勤彼衰亂之無道兮
乃困畏乎聖人懷容與而久駐兮忘日夕而將昏到長垣
之境界兮察農野之居民睹蒲城之丘墟兮生荊棘之榛
榛惕覺寤而顧問兮想子路之威神衛人嘉其勇義兮訖

于今而稱云蘧氏在城之東南兮民亦尙其丘墳唯令德
爲不朽兮身既沒而名存惟經典之所美兮貴道德與仁
賢吳札稱多君子兮其言信而有徵後衰微而遭患兮遂
陵遲而不興知性命之在天由力行而近仁勉仰高而蹈
景兮盡忠恕而與人好正直而不回兮精誠通於明神庶
靈祇之鑒照兮祐貞良而輔信亂曰君子之思必成文兮
蓋各言志慕古人兮先君行止則有作兮雖其不敏敢不
法兮貴賤貧富不可求兮正身履道以俟時兮脩短之運
愚智同兮靖恭委命唯吉凶兮敬慎無怠思謙約兮清靜

少欲師公綽兮

鍼縷賦

鎔秋金之剛精形微妙而直端性通遠而漸進博庶物而
一貫惟鍼縷之列迹信廣博而無原退逶迤以補過似素
絲之羔羊何斗筭之足算咸勒石而升堂

古文苑

蟬賦

吸清露於丹園抗喬枝而理翮崇皇朝之輝光昭豹貂而
灼灼

事類賦卷三十一
九百四十四
豹貂

復丹款之未足留滯恨乎天際

注文選

大雀賦

事類賦卷十九注曹大家集兄超爲西域都護獻
大雀詔大家作頌圖書集成引作賦

嘉大雀之所集生岷崙之靈丘同小名而大異乃鳳凰之
匹儔懷有德而歸義故翔萬里而來遊集帝庭而止息樂
和氣而優上下協而相親聽雅頌之雍雍自東西與南北
咸思服而來同

頌

欽器頌

侍帝王之密坐

文選四十
注下佚

疏

上鄧太后問鄧騭以母憂乞身疏

後書本傳永初中太后兄大將軍鄧騭以母憂上
書乞身太后不欲許以問昭昭因上疏曰

伏惟皇太后陛下躬盛德之美隆唐虞之政闢四門而開
四聰采狂夫之謦言納芻蕘之謀慮妾昭得以愚朽身當
盛明敢不披露肝膽以效萬一妾聞謙讓之風德莫大焉
故典墳述美神祇降福昔夷齊去國天下服其廉高太伯

違邠孔子稱爲三讓所以光昭令德揚名于後者也論語
曰能以禮讓爲國於從政乎何有由是言之推讓之誠其
致遠矣今四舅深執忠孝引身自退四舅謂驢也而以方垂
未靜拒而不許如後有毫毛加於今日誠恐推讓之名不
可再得緣見逮及故敢昧死竭其愚情自知言不足采以
示蟲蠅之赤心

請兄超召還歸老疏

後書超傳超自以久在絕域年老思土

永元

十二年

上疏遣子勇隨獻物入塞而超妹同郡曹壽妻昭

亦上書請超曰

妾同產兄西域都護定遠侯超幸得以微功特蒙重賞爵
列通侯位二千石天恩殊絕非小臣所當被蒙超之始出
志捐軀命冀立微功以自陳效會陳睦之變道路隔絕超
一身轉側絕域曉譬諸國因其兵衆每有攻戰輒爲先登
身被金夷不避死亡賴蒙陛下神靈且得延命沙漠至今
積三十年骨肉生離不復相識所與相隨時人士衆皆已
物故超年最長今且七十衰老被病頭髮無黑兩手不仁
耳目不聰明扶杖乃能行雖欲竭盡其力以報塞天恩迫

於歲暮犬馬齒索蠻夷之性悖逆侮老而超旦暮入地久
不見代恐開姦宄之源生逆亂之心而卿大夫咸懷一切
莫肯遠慮如有卒暴超之氣力不能從心便爲上損國家

累世

文選述祖勛詩注引此文
累世下有德勞遠圖四字

之功下棄忠臣竭力之用

誠可痛也故超萬里歸誠自陳苦急延頸踰望三年於今
未蒙省錄妾竊聞古者十五受兵六十還之亦有休息不
任職也緣陛下以至孝理天下得萬國之歡心不遺小國
之臣况超得侯伯之位故敢觸死爲超求哀乞超餘年一
得生還復生闕庭使國永無勞遠之慮西域無倉卒之憂

超得長蒙文王葬骨之恩子方哀老之惠詩云民亦勞止
汔可小康惠此中國以綏四方超有書與妾生訣恐不復
相見妾誠傷超以壯年竭忠孝於沙漠疲老則使捐死於
曠野誠可哀憐如不蒙救護超後有一旦之變冀幸超家
得蒙超母衛姬先請之貸妾愚戇不知大義觸犯忌諱

難問神

錄

御覽五百二二引三輔決錄曰周季貞班固姊
之子也善屬文喪婦作問神其姨曹大家難之

幽通賦注

文選家引注